

LEKSYON 3

**ANG IMO AMAY
NAGAPAKIGHAMBAL
SA IMO**



Ang Matun-an Mo Sa Sini Nga Leksyon

Ang Dios Buot Magpakighambal sa Imo

Ang Dios Nagahambal sa Madamo nga Paagi

Paano Ginsulat ang Libro sang Dios Mga Reperensya sa Biblia

Paano Mabatian ang Tingog sang Dios

Ang Dios Buot Magpakighambal sa Imo

Ano nga sari sang amay ang wala nagakalipay sa pagpakighambal sa iya mga anak bisan ini sila

lapsag pa kag yuhom lang ang mahatag nga sabat? Ang Langitnon mo nga Amay buot man magpakighambal sa Iya mga anak, magpakita sang Iya gugma sa ila, magtudlo sa ila, kag magbulig sa ila mga gumontang. Luyag ka bala nga magpamati sa Iya tingog?

Buhata Ini

1. Ang Dios

- a) buot magpakighambal sa Iya mga anak
- b) balaan kaayo kag indi takos nga magpakighambal sa aton.
- k) wala naga pakighambal sa mga tawo karon.

Sabat: 1. a) buot magpakighambal sa Iya mga anak.

Ang Dios Nagahambal sa Madamo nga Paagi

“Ang Dios sa dumaan nga ti-on naghambal sa aton mga ginikanan paagi sa mga manalagna sa madamo kag sari-sari nga bagay; apang sa sining ulihi nga mga adlaw naghambal Sia sa aton paagi sa Anak. . .” Mga Hebreo 1:1, 2.

Yari ang pila ka mga paagi sang paghambal sang Dios sa imo.

▲ Direkta sa Imo Tagipusoon

Ang Balaan nga Espiritu nagahimo sang presensya ni Ginuong Jesus nga matuod sa imo. Mahimo nga maghambal Sia paagi sa imo konsensya, nga magapabatyag kon ano ang imo dapat himuon ukon magapaandam sa imo nga indi ka maghimo sang isa ka bagay. Mahimo Niya nga himuon ang isa ka espirituhanon nga kamatuoran nga magmaathag sa imo. Ukon imo mabatyagan nga ang Dios buot magpabuhat sa imo sang isa ka butang. Kon magpangamuyo ikaw, pangayoa sa Dios nga maghambal sa imo kag paabota nga mabatian ang Iya tingog sa imo tagipusoon.

Buhata Ini

2. Paano makahambal ang Dios sa imo tagipusoon?

(Pagpili sang duha ka sabat)

.... a) makabati ikaw sing tingog

.... b) mabatyagan nimo nga luyag ka magbuhat sang isa ka butang.

.... k) paagi sa damgo kag palanan-awon.

.... d) ang espirituhanon nga kamatuoran mahimo nga sa hinali magmangin matuod kag maathag sa imo.

Sabat: 2. b) mabatyagan nimo nga luyag ka magbuhat sang isa ka butang. d) ang espirituhanon nga kamatuoran mahimo nga hinali magmangin matuod kag maathag sa imo.

▲ Paagi sa Iya mga Pagpakamaayo

Ginasiling sang madamo nga mga Kristiano nga sa tion nga sila natawo liwat nagbalhin ang ila panan-aw sang kalibutan. Kag mahimo nga may bag-o man ikaw nga pagtamod sa mga pagpakamaayo sang Dios samtang nagatulok ikaw sa palibot nimo. Mabatyagan mo ang Iya presensya sa katahum sang iya mga binuhat sa kalibutan. Mabatyagan mo nga malapit Sia sa imo paagi sa mainiton nga pagpakig-abyan sang iban nga Kristohanon. Ang kapid-an nga mga pagpakamaayo sa palibot nimo nagasugid sang kaayo sang Dios. Nagahambal Sia bilang pagsabat sang imo mga pagpangamuyo. Ang mata sang pagtuo makakita sang yuhum sang Dios kag ang igdulogog sang Dios kag ang igdulogog sang imo espiritu makabati sang Iya ginasiling, “Anak, ginahigugma ko ikaw.”

Buhata Ini

3. Nakahambal bala ang Dios sa imo?
Kasan-o?
4. Hingalani ang pila sang mga pagpakamaayo nga imo nabaton nga nagpakilala sa imo nga ginahigugma ikaw sang Dios.

.....

.....

.....

.....

▲ Paagi sa Iban nga mga Kristohanon

Sa sulod sang isa ka panimalay kon kaisa

mabati-an naton ang kamagulangan nga nagasabdong sa iya mga manghod, “Indi, indi! Indi gusto ni Tatay ina.” Ukon, “Tan-awa bala, amo ini ang gusto ni Tatay.”

Ang Dios nagahambal man sa iya mga anak paagi sa mga hamtong nga kautoran sa iglesia. Buot Niya nga magpakigkita kita sa masunson sa mga Kristohanon agod magamit Niya sila sa pagpabaskog, sa pagtuytoy kag sa pagbulig sa aton.

Magpasakop kamo ang isa sa isa sa pagta-hud kay Kristo. Mga Taga Efeso 5:21.

Buhata Ini

5. Nakabulig na bala ang iban nga mga Kristohanon sa imo sa paghangop kon ano ang buot sang Dios nga imo buhaton?
6. May nakabulig bala sa pagpabakod sa imo agod magmaayo ikaw nga Kristohanon? Sin-o?
7. Pasalamat ang Dios karon tungod nga nagapakighambal Sia paagi sa Iya mga anak. Pangayoa sa Iya nga makahambal Sia paagi sa imo sa pagbulig sa iban agod makakita man sila sang kaluwasan, ukon sa pagpabakod sang iban sa pagsunod sa Ginuo.

- ▲ Paagi sa espirituhanon nga mga hiyas kag mga pag-alagad

Ginhatag sang Balaan nga Espiritu sa Iglesia ang nanuhaytohay nga mga hiyas nga espiritu-

hanon. Nagahambal Sia sa aton paagi sining mga hiyas. Nagahatag Sia sang mensahe sang Dios para sa Iglesia sa mga pastor, mga manunudlo, mga ebanghelista kag mga manunulat. Buot Sia maggamit sang tanan nga mga Kristohanon sa pagsugid sa iban nahanungod sa Dios. Kag mala-halon gid para sa imo ang pagtambong sang mga panimbahon sa masunson. Sa tagsa ka tion nga ikaw magsimba, pamatii kon ano ang igahambal sang Langitnon nga Amay sa imo.

Kay diin ang duha ukon tatlo nagatipon sa akon ngalan, yara ako sa tunga nila. Mateo 18:20.

Buhata Ini

8. (Magpili sang duha ka husto nga sabat)
Kon kaisa nagahambal ang Dios sa mga katawohan paagi sa
.... a) wali sang pastor ukon ebanghelista
.... b) mga espiritista
.... k) mga babaylan
.... d) mga balasahon kag libro sang mga Kristohanon nga manunulat.
9. Kon yara ikaw sa simbahan nagapaabot bala ikaw nga maghambal ang Dios sa imo?
10. Nakapakighambal bala ang Dios sa imo paagi sa sini nga libro?
11. Pangayoa sa Dios nga magpakighambal Sia sa imo sa tanan nga tulon-an sini nga libro.

Sabat: 8. a) wali sang Pastor ukon ebanghelista. b) sa balasahon kag libro sang mga Kristohanon nga manunulat.

▲ Paagi sa mga ambahanon

Masami nga magahambal ang Dios sa imo paagi sa mga tinaga sang mga ambahanon ukon sa malip-ot nga mga kalantahon sang Maayong Balita. Matingala ikaw nga masunson ibutang Niya sa imo panghunahuna ang mga tinaga sang ambahanon sa tion gid nga kinahanglanon mo ang mensahe sini.

Nga nagahinambalay sa salmos kag mga ambahanon kag mga kalantahon nga espirituhanon, nga nagaambahan kag naga-dayaw sa Ginuo sa inyo bug-os nga tagipusoon. Mga Taga Efeso 5:19.

Buhata Ini

12. Pangayoa sa Ginuo nga buligan ikaw nga makahibalo gilayon sang kalantahon nga ginakanta sa simbahan. Kantaha ini sa inyo balay sing masunson.
13. Himoa nga kinabatasan nimo ang maghunahuna nahanungod sang imo ginakanta. Hangpa sing maayo ang imo ginakanta. Pangayoa sa Ginuo nga buligan Niya ikaw nga magamit sa imo kabuhi ang mga pulong sang kalantahon.

▲ Paagi sa Biblia

Nagahambal ang Dios sa imo paagi sa Iya libro, ang Balaan nga Kasulatan. Amo ini ang pat-od nga paagi sa pagpahibalo sang Iya mensahe. Ang pastor indi makahibalo sa tanan nga tion sang kabubot-on sang Dios sa imo. Ang mga kautoran nimo kay Kristo mahimo nga makahatag sang laygay nga indi husto. Kag indi sa tanan nga tion nga ang damgo kag palanan-awon nagagikan sa Dios. Mahimo nga damguhon nimo ang butang nga masunson mo ginahunahuna, ukon ang butang nga ginalubong nimo sa imo painuino. Mahimo nga makabatyag ikaw sa paghimo sang isa ka bagay, kag abi nimo nga amo ina ang gusto sang Dios nga pagabuhaton mo, apang ang kaugalingon nimo nga handum amo ang nagapilit sa imo sa paghimo. Gani, paano naton mahibaloan ang tingog sang Dios?

Salamat sa Dios nga may mensahe Sia nga nasulat para sa imo sa Biblia. Kinahanglan timbangan naton ang tanan nga butang suno sa nasulat sa Biblia. Amo ina kon ngaa nga kinahanglan gid ang pagtuon sang Pulong sang Dios, subong sang imo ginahimo karon. Paagi sining una nga pagtuon, mahangpan mo pa gid ang Biblia. Matun-an nimo kon paano mabutang sa buhat ang mga ginatudlo sini sa imo kabuhi.

Buksi ang akon mga mata, agud nga makakita ako sing makatilingala nga mga butang gikan sa imo kasugoan. Sa gihapon, O Ginuo ang imo pulong malig-on sa langit. Ang imo mga pulong suga sa akon mga tiil kag

kapawa sa akon banas. Ang pagbukas sang imo mga pulong nagahatag sing kapawa; nagahatag ini sing paghangup sa bunayag. Ang kabug-osan sang imo pulong kamatuoran kag ang tagsa-tagsa sang imo matarung nga mga pagsulondan nagapadayon sa gihapon. Salmo 119:18, 89, 105, 130, 160.

Buhata Ini

14. Ang pat-od nga paagi sa paghibalo sang mensahe sang Dios para sa imo amo

.... a) ang pagtuon kon ano ang ginasing sang Dios sa Biblia.

.... b) ang pagpamati sang laygay sang imo mga abyan.

.... k) ang imo balatyagon nahanungod sang imo pagabuhaton.

Sabat: 14. a) ang pagtuon kon ano ang ginasing sang Dios sa Biblia.

Paano Ginsulat ang Libro sang Dios

Sa mga dag-on nga nagliligad, ang Dios nagpili sang maayo nga mga tawo sa pagsulat sang Iya mensahe. Ginbugnaan sila sang Balaan nga Espiritu kon ano ang ila isulat. Ang Dios naggamit sing bale kap-atan ka mga tawo sa pagsulat sang libro nga ginatawag ang Balaan nga Kasulatan, sa kalawigon nga kapin sa 1,600 ka tuig.

Ang libro nga ini may himpit nga pag-ugyon kag nagapahayag sang isa lamang ka tema sa pagkaisa nga aton mahibaloan nga ini naghalin sa isa ka tagpatuga – Dios.

Buhata Ini

15. (Pagpili sang duha ka husto nga sabat.)

Ang mga tawo nga nagasulat sang Biblia

.... a) maayo nga mga tawo.

.... b) ginbayaran sang hari sa pagsulat.

.... k) ginbugnaan sang Balaan nga Espiritu.

.... d) naghimo sing madamo nga sayop.

Sabat: 15. a) maayo nga mga tawo. k) ginbugnaan sang Balaan nga Espiritu.

Sa mga tinuig nga nagligad, ginpatipon sang Dios sa Iya mga kaanakan ining kan-uman kag anom nga mga libro kag ginhimo nga isa ka libro, ang Balaan nga Kasulatan ukon Biblia. Ang kahulogan sang Balaan nga Kasulatan amo ang *mga libro sang Dios*. Ang nahauna nga katloan kag siyam ka libro nasulat sang wala pa matawo si Ginuong Jesus diri sa duta. Amo ina ang ginatawag nga Daan nga Katipan. Ang ikaduha nga bahin sang Biblia amo ang Bag-o nga Katipan. May duha ka napulo kag pito ka mga libro diri nga nasulat pagkatapos nga nagkari si Jesus kag naghimo sang isa ka bag-o nga katipan sa tunga sang Dios kag sang tawo. Ining mga libro naghahatag sa aton sang mga tulomanon sa sining katipan.

Buhata Ini

16. Ang Biblia may duha ka dalagku nga bahin nga ginatawag

.... a) Ang Daan nga Katipan kag ang Apokalipses.

.... b) Ang Daan nga Katipan kag Bag-o nga Katipan.

.... k) Ang kasugoan kag ang Manalagna.

17. Pila tanan ka libro ang yara sa Biblia?

.... a) 39 ka libro sa Daan nga Katipan kag 27 ka libro sa Bag-o nga Katipan

.... b) 29 ka libro sa Daan nga Katipan kag 37 ka libro sa Bag-o nga Katipan.

Sabat: 16. b) Ang Daan nga Katipan kag Bag-o nga Katipan. 17. a) 39 ka libro sa Daan nga Katipan kag 27 ka libro sa Bag-o nga Katipan.

Sa kamunoan ginsulat ang Daan nga Katipan sa pulong nga Hebreo. Kag ang Bag-o nga Katipan nasulat sa Griego. Ginhatag sang Dios sa aton ang Iya Libro para sa tanan nga mga katawhan. Kag gusto Niya nga ang tanan nga mga katawhan makabasa sini. Gani ginbuligan Niya ang Iya mga kaanakan sa pagbadbad sang Iya pulong sa nagkalainlain nga mga pinulongan. Karon, may mga bahin sang Biblia nga nabadbad na sa kapin sa 1,300 ka mga pinulongan.

Buhata Ini

18. Sa kamunoan ginsulat ang Biblia sa pulong nga

- a) Hebreo kag Latin
- b) Español kag Griego
- k) Pransea kag Inglis
- d) Hebreo kag Griego

19. Ang Biblia amo ang

- a) libro para sa aton tanan
- b) libro para lamang sa mga mataas sing tinun-an
- k) libro para sa mga ministro kag indi para sa iban.

Sabat: 18. d) Hebreo kag Griego 19. a) libro para sa tanan

Kon kaisa, sa isa ka pinulongan madamo ang mga pagbadbad sang Biblia. May iya sang Katoliko kag may iya sang Protestante. Apang pareho man lang ang ila ginapaathag ukon ginahambal.

Ang mga bersikulo sa sini nga mga tulon-an ginkuha sa Hiligaynon nga pagbadbad sang Biblia.

Buhata Ini

20. Ang mga dinalan sang Bag-o nga Katipan sa sini nga libro ginkuha sa
- a) "King James Version"
 - b) "Revised Standard Version"
 - k) Hiligaynon nga Biblia

Sabat: 20. k) Hiligaynon nga Biblia

Mga Reperensya sa Biblia

Ang tagsa ka libro sang Biblia ginabahin sa mga kapitulo. Ang tagsa ka kapitulo ginabahin sa pila ka mga dinalan nga ginatawag nga bersikulo. Ang mga kapitulo kag bersikulo ginanumerohan agud madali naton makita ang aton ginapangita sa Biblia. Kon gusto mo matandaan ang isa ka dinalan sa Biblia, isulat anay ang ngalan sang libro, masunod numero sang kapitulo, butangan sang duha ka pintok (:) kag numero sang bersikulo. Ang Juan 3:16 nagatudlo sa imo sa libro ni Juan, kapitulo 3, kag bersikulo 16.

Kon nagasulat ikaw sang duha ka bersikulo ukon madamo nga bersikulo nga indi pasunod, bahina ang tagsa ka numero paagi sa kudlit (.). Ang Juan 3:16, 17, 20 nagakahulogan nga ang mga bersikulo makita sa libro ni Juan, kapitulo 3, bersikulo 16, 17 kag 20. Amo ini ang reperensya sa Kasulatan.

Ang malip-ot nga linya nga yara sa tunga sang duha ka numero, nagapakilala nga ang tanan nga bersikulo nga nalikop sang amo nga mga numero ginalakip sa amo nga reperensya. Busa, ang Juan 3:16 - 22 nagakahulogan sa libro ni Juan, kapitulo 3, bersikulo 16 tubtob sa 22.

Kon indi gani pasunod ang bersikulo imo sila bahinon paagi sa kudlit (.). Ang Juan 3:16, 22, 23 nagakahulogan, sa libro ni Juan, kapitulo 3, bersikulo 16, 22 kag 23.

Kon nagasulat ikaw sang bersikulo sa lain nga kapitulo, gamita ang pintok kag kudlit (;) sa pagbahin sang reperensya. Ang Juan 3:16, 6:24 nagakahulogan nga libro ni Juan, kapitulo 3, bersikulo 16; kag Juan kapitulo 6, bersikulo 24.

Paano Mabatian ang Tingog sang Dios

Sa wala pa ikaw makapamati sa isa ka estasyon sang radyo, imo anay ipahamtang ang lilisoan agod maghisanto sa husto nga estasyon. Paano nimo mapahamtang ang lilisoan sang imo espiritu agod mabatian mo ang tingog sang Dios? Yari ang pila ka paagi sa paghimo sini.

- ▲ Basaha ang Biblia adlaw-adlaw
- ▲ Panumdoma kon ano ang imo ginbasa sa Biblia. Magpamalandong ikaw sa Pulong sang Dios.
- ▲ Himoa nga kinabatasan nimo ang pagsulit-sulit basa kag pagsaulo sang mga bersikulo sa Biblia labi na yadtong naluyagan nimo.

Ang bug-os nga Kasulatan ginbugna sang Dios kag mapinuslanon sa pagpanudlo, sa pagsabdong, sa pagsaway kag sa paghanas sa pagkamatarung, agud nga ang tawo sang Dios mahimpit, nga masangkapan nga sa tagsa ka maayong buhat. 2 Timoteo 3:16, 17.

Kon nagasugod pa lang ikaw sa pagbasa sang Biblia, magsugod sa Bag-o nga Katipan. Ang Dios magahambal sa imo sa maathag gid nga paagi sa kabuhi ni Ginuong Jesus kag sa Iya nga pagtudlo. Magadugang pa gid ang imo ihibalo nahanungod sa Bag-o nga Katipan nga ginhimo sang Ginuo sa aton sa wala pa nimo matun-i ang Daan nga Katipan.

Ang Dios sa dumaan nga tion naghambal sa aton mga ginikanan paagi sa mga manalagna sa madamo kag sarisari nga bagay; apang sa sining ulihi nga mga adlaw naghambal Siya sa aton paagi sa Anak. . . Mga Hebreo 1:1, 2.

- ▲ Magsimba sing masunson nga nagapaabot nga magpakighambal sa imo.
- ▲ Magpangamuyo adlaw-adlaw. Pangayoa sa Dios nga magpakighambal Sia sa imo. Kon magpangamuyo ikaw, mahimo nimo piyungon ang imo mga mata agod mapaiway ang mga butang sa palibot nimo nga makatublag sa imo. Kag indi nga ikaw lamang ang magahambal sa tanan nga tion. Maghulat man ikaw nga makahambal Sia sa imo tagipusoon.

- ▲ Magkanta sang mga ambahanon sa Ginuo kag hangpa ang kahulogan sini.
- ▲ Himoa nga kinabatasan nimo ang magtulok sa kaayo sang Dios, sa Iya gahum kag gugma sa palibot nimo.
- ▲ Magbasa ikaw sang mga balasahon nga Kristohanon kag magpamati sa Maayong Balita nga ginawaragwag sa radyo.
- ▲ Magpakighinun-anon ikaw sa iban nga mga Kristohanon nahanungod sa Dios kag sa Iya Pulong.
- ▲ Himuon mo ang ginasiling sang Dios nga imo pagabuhaton. Dumdoma nga kon Sia ang imo Manugtuytoy, kinahanglan magsunod ikaw sing matinumanon.
- ▲ Magmatutom ikaw sa imo mga leksyon sa sini nga libro kag sa iban nimo nga pagtuon sa Biblia, kag pangayoa sa Dios nga maghambal Sia sa imo paagi sini nga leksyon.

Buhata Ini

21. Karon sulati ang imo Palasina-
wan kag Rekord sang Bumolutho
para sa Leksyon 3.

PAGPAKILALA sang LEKSYON 4

Nakapainuino bala ikaw kon ano ang ginahalinan sang espirituhanon nga kusog? Kon paano bala magmaisog ang mga Kristohanon sa pag-atubang sang mga leon, kag pagkadto sa wala makilala nga duog kag magbatas sang mga kalisod kag paghingabot? Ngaa bala nga ang iban nga Kristohanon makakabuhi sang madinaugon nga kabuhi samtang nagakapalta ang iban?

Ang Leksyon 4 sa sining mga tulong sa “ANG BAG-O MO NGA KABUHI” magapahayag sang paagi sa pag-angkon sang gahum nga matuod nga nagakatabo sa nagadamo nga Kristohanon sa bug-os nga kalibutan. Ikaw mahimo man nga makatuon sang paagi sa pag-angkon sang espirituhanon nga kusog kag pagkahamtong. Kon buot gid ikaw magtubo espirituhanon kag nga magmangin makusog nga Kristohanon magsulat karon nga adlaw para sa leksyon 4 nga ginatig-ulohan “GUSTO MO BALA NGA MAGTUBO?” Mga bag-o nga paagi sa pagtubo kag pagdugang sa espirituhanon nga kusog ang matukiban nimo sa masunod nga leksyon.